

Izabrane

KUR'ANSKE I POSLANIKOVE DOVE



Vjervanje Bošnjaka



Uzvišeni Allah veli:

Pozovite Me i zamolite, Ja ću vam se odazvati.

El-mu'min, 60.

Poslanik ﷺ kaže:

Uzvišeni Allah veli: 'Sine Ademov, dok Me budeš molio i Mome oprostiti se nadao, Ja ću ti oprostiti šta god učinio, ne obazirući se na to!'

Tirmizi, 3540.



Izabrane
Kur'anske
dove



Gospodaru naš, podaj nam dobro i na ovome i na Onome svijetu i sačuvaj nas patnje u Ognju!.

El-Bekare, 201.



Gospodaru naš, mi zaista vjerujemo, zato nam oprosti grijehе naše i sačuvaj nas patnje u Vatri.

Ali-Imran, 16.



Gospodaru moj, daj da ja i potomci moji obavljamo namaz; Gospodaru naš, Ti usliši molbu moju!.

Gospodaru naš, oprosti meni i roditeljima mojim i svim vjernicima na Dan kad se bude polagao račun!

Ibrahim , 40-41.



Gospodaru naš, podari nam u ženama našim i djeci našoj radost i učini nas predvodnicima bogobojaznih!.

El – Furkan, 74.



Gospodaru moj, oprosti meni i roditeljima mojim i onome koji kao vjernik u dom moj uđe i vjernicima i vjernicama, a nasilnicima samo propast povećaj!.

Nuh, 28.



Gospodaru naš, oprosti nam grijehе naše i rasipnost našu u postupcima našim, učvrsti korake naše i pomози nam protiv naroda nevjerničkog!.

Ali-Imran, 147.



Gospodaru moj, podari mi mudrost i pridruži me onima koji su dobri i učini da me po lijepom spominju oni što će poslije mene doći i učini me jednim od onih kojima ćeš dženetske blagodati darovati.

Eš-Šu'ara, 83-85.



Gospodaru naš, ne uzmi nam u grijeh ako zaboravimo ili nehotice pogriješimo! Gospodaru naš, ne tovari na nas breme kao što si ga natovarao na one prije nas! Gospodaru naš, ne opterećuj nas onim za što nemamo snage! Ti preko grijeha nam prijeđi, oprosti nam i smiluj nam se! Ti si Gospodar naš, pa nas pomози protiv naroda koji ne vjeruje!.

El-Bekare, 286.

Gospodaru moj, nadahni me da budem zahvalan na blagodati Tvojoj, koju si ukazao meni i roditeljima mojim i da činim dobra djela na zadovoljstvo Tvoje, i uvedi me, milošću Svojom, među dobre robove Svoje!.

En-Neml, 19.



Tebi se ja, Gospodaru moj, obraćam za zaštitu od priviđenja šejtanskih i Tebi se, Gospodaru moj, obraćam da me od njihova prisustva zaštitiš!.

El-Mu'minun, 97-98.



Gospodaru naš, ne daj nam da budemo s narodom grješnim!.

El-A'raf, 47.

Gospodaru naš, mi smo čuli glasnika koji poziva vjeri: 'da vjerujete u Gospodara vašega!', pa smo povjerovali! Gospodaru naš, oprosti nam grijehe i pokrij hrđave postupke naše i usmrti nas s onima koji su dobri! Gospodaru naš, daj nam ono što si nam obećao preko Svojih poslanika i ne ponizi nas na Sudnjem danu! Ti, doista, ne kršiš obećanje Svoje!.

Ali-Imran, 193-194.



Gospodaru naš, daruj nam Svoju milost i pruži nam u ovom našem postupku smjernost.

El-Kehf, 10.



Gospodaru naš, Ti sve obuhvaćaš mi-lošću i znanjem; zato oprosti onima koji su se pokajali i koji slijede Tvoj put i saču-vaj ih patnje u vatri! Gospodaru naš, uvedi ih u edenske vrtove koje si im obećao i pretke njihove i žene njihove i potomstvo njihovo - one koji su bili dobri; Ti si, uistinu, silan i mudar. I saču-vaj ih posljedica loših djela, jer, koga Ti toga dana poštediš posljedica loših djela - Ti si mu se smilovao, a to će, zaista, veliki uspjeh biti!.

Gafir, 7-9.



Gospodaru moj, podari mi od Sebe česti-ta potomka, jer Ti doista molbu čuješ!.

Ali Imran, 38.

Gospodaru naš, oprosti nama i braći našoj koja su nas u vjeri pretekla i ne dopusti da u srcima našim bude imalo zlobe prema vjernicima; Gospodaru naš, Ti si, zaista, dobar i milostiv.

El-Hašr, 10.



Gospodaru naš, mi vjerujemo, zato nam oprosti i smiluj nam se, jer Ti si najmilostiviji!.

El-Mu'minun, 109.



Gospodaru naš, učini potpunim svjetlo naše i oprosti nam jer Ti, doista sve možeš.

Et-Tahrim, 8.



Gospodaru naš, poštedi nas patnje u Džehennemu jer je patnja u njemu, doista, propast neminovna.

El-Furkan, 65.



Gospodaru naš, u Tebe se uzdamo i Tebi se obraćamo i Tebi ćemo se vratiti.

El-Mumtehina, 4.



Gospodaru naš, daj nam snage da izdržimo i učini da kao vjernici umremo!

El-A'raf, 126.



Gospodaru naš sami smo sebi krivi, i ako nam Ti ne oprostiš i ne smiluješ nam se, sigurno ćemo biti izgubljeni.

El-A'raf, 23.

Gospodaru naš, nemoj skrenuti srca naša nakon što si nas uputio i daruj nam od Sebe milost!.

Ali – Imran, 8.



Gospodaru naš, mi vjerujemo u ono što si Ti objavio, mi Poslanika slijedimo, pa upiši nas među svjedoke.

Ali – Imran, 53.



Gospodaru naš, nadahni nas izdržljivošću i učvrsti noge naše i pomози nam protiv naroda koji ne vjeruje!.

El-Bekare, 250.



Gospodaru naš, primi od nas, jer Ti, uistinu, sve čuješ i znaš.

El-Bekare, 127.



Gospodaru moj, oprosti i smiluj se, Ti si Samilosnik Najbolji!.

El-Mu'minun, 118.



Gospodaru moj, ja sam sam sebi zlonanio, oprosti mi!.

El-Kasas, 16.



Gospodaru moj, učini ovo mjesto sigurnim boravištem i snabdij plodovima stanovnike njegove, one između njih koji budu u Allaha i drugi svijet vjerovali!.

El-Bekare, 126.

Gospodaru moj, uputi me da Ti zahvalim na Tvojim blagodatima, koju si darovao meni i mojim roditeljima, i da dobro radim s kojim si zadovoljan Ti, i potomstvo moje Ti učini dobrim! Ja se Tebi, doista, kajem, i ja sam musliman.

El-Ahkaf, 15.





Izabrane
Poslanikove
dove





Bože moj, ja Te molim za uputu, bogobožnost, čestitost i neovisnost (od ljudi)!

Muslim, br. 2721.



Moj Bože, daj da blagodati koje mi Ti pružaš ne prestanu i da mi se zdravlje koje si mi podario ne pogorša. Daj da me ne stigne Tvoja iznenadna kazna ni bilo koji oblik Tvoje srdžbe.

Muslim, 2739.



Tražim zaštitu kod Allaha od teških trenutaka nesreće, od toga da me pogodi propast, od zle sudbine i od zlobne pakosti neprijatelja.

Muslim, br. 2707.





Moj Bože, utječem Ti se od slabosti i lijenosti, od kukavičluka, oronulosti i škrtosti. Utječem Ti se od kaburske kazne i od iskušenja života i smrti.

Buhari br. 6367, i Muslim br. 2706.



Bože moj, utječem Ti se od onoga što je loše u onom što sam radio i od onoga što je loše u onom što nisam radio.

Muslim, br. 2716.



O Ti koji okrećeš srca, okreni moje srce ka Tvojoj vjeri.

Tirmizi, br. 3586.





Bože moj, popravi moju vjeru, koja je moja zaštita, i popravi mi ovaj svijet na kojem živim; i popravi mi Ahiret, na koji ću se vratiti, i povećaj mi svako dobro u životu, a smrt mi učini rasterećenjem od svakog zla!

Muslim, br. 2720.



Bože moj, Ti koji okrećeš srca, okreni naša srca tako da budu pokorna Tebi!

Muslim, br. 2754.



Allahu moj, sačuvaj me zla moga sluha, pogleda, jezika, srca i zla razvrata i bluda.

El-Edebul-mufredu, br. 663.





Gospodaru moj, pomози me, a nemoj nikoga pomoći protiv mene; daj mi da pobijedim, a ne da budem pobijeđen; da preduhitrim spletke, a ne da budem njihova žrtva. Uputi me i olakšaj mi da idem Pravim putem i pomози mi da nadvladam onoga ko mi želi nešto ružno učiniti. Gospodaru moj, učini me Tebi mnogo zahvalnim, onim koji Te stalno ima na umu, potpuno predanim, jako poslušnim, Tebi poniznim, i onim koji Te često priziva i koji Ti se iskreno kaje. Gospodaru moj, primi moje pokajanje i očisti moje grijehe, uslišaj moju dovu, učvrsti moj dokaz, uputi moje srce i odstrani zlobu iz mojih prsa.

El-Edebul-mufredu, br. 665.



Allahu, tražim Tvoju zaštitu od brige i tuge, nemoći i lijenosti, kukavičluka i tvrdičluka, tereta duga i premoći ljudi.

El-Edebul-mufredu, br. 672.



Bože moj, oprosti mi ono što sam učinio i ono što ću učiniti, što sam prikrrio i što sam obznanio, a što Ti znaš bolje od mene. Ti unapređuješ i unazađuješ, nema istinskog boga osim Tebe.

Buhari br. 1120, i Muslim br. 769.



Allahu, udalji od mene loše ponašanje, prohtjeve, djela i sve vrste bolesti.

Hakim, 1/520.





Allahu moj, Tebi se predajem, u Tebe vjerujem, na Tebe se oslanjam, Tebi se želim. Gospodaru nas, sačuvaj me Tvojom moći da ne budemo u zabludi. Nema istinskog boga osim Tebe, Ti si vječno živi, koji ne umire, a džini i ljudi umiru.

Muslim, br. 2717.



Allahu, pomoz nas da Te spominjemo, da Ti se zahvaljujemo i da Te na najljepši način obožavamo.

Hakim, 1/499.



Allahu, oprosti mi, smiluj mi se, uputi me, sačuvaj me i opskrbi me.

Muslim, br. 2696.





Allahu moj, od Tebe tražim svako dobro i brzo (na ovome svijetu) i odgođeno (na Onome svijetu) i ono koje Ti poznaješ, a ja ne znam. Utječem Ti se od svakog zla i brzog (na ovom svijetu) i odgođenog (na Onome svijetu) i onog koje Ti znaš, a ja ne znam. Molim Te za dobro za koje Te je molio Tvoj rob i vjerovjesnik, i utječem Ti se od zla od kojeg Ti se utjecao Tvoj rob i vjerovjesnik. Molim Te za Džennet, i riječi i djela koja njemu vode, i utičem ti se od Vatre, i riječi i djela koja njoj vode, i molim Te da sve što odrediš bude dobro za mene.

Ibn Madže, br. 3846.





Allahu, daj mi korist u onome čime si me podučio i poduči me onome što će mi koristiti i znanje mi povećaj.

Ibn Madže, br. 251.



Allahu moj, sklanjam se pod zadovoljstvo Tvoje pred srdžbom Tvojom, pod oproštaj Tvoj pred kaznom Tvojom, od Tebe tražim zaštitu pred Tobom. Nisam u stanju ispoljiti Tebi zahvalu. Ti si onakav kako si o Sebi (pohvalno) rekao.

Muslim, br. 486.



Allahu, Ti opraštaš grijehe, plemenit si, voliš opraštanje, pa mi oprosti.

Tirmizi, br. 3513.





Allahu, molim Te za korisno znanje, čistu i halal opskrbu i da mi djela primiš.


Ibn Madže, br. 925.



Bože moj, utječem Ti se od nemoći i od lijenosti, od kukavičluka, tvrdičluka, brige i od patnje u kaburu. Bože moj, podari mojoj duši bogobožnost i očisti je jer Ti je najbolje čistiš, Ti si njen zaštitnik i njen gospodar. Bože moj, utječem Ti se od znanja koje ne koristi, od srca koje nije skrušeno, od duše nezasite i od dove koja neće uslišana biti.

Muslim, br. 2722.





SADRŽAJ

❁ Izabrane Kur'anske dove	2
❁ Izabrane Poslanikove dove	14

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ